

## GOODWIN, JOHN (1681 - 1763), gweinidog olaf y Crynwyr yng Ngogledd Cymru

**Enw:** John Goodwin  
**Dyddiad geni:** 1681  
**Dyddiad marw:** 1763  
**Plentyn:** John Goodwin  
**Rhiant:** Thomas Goodwin  
**Rhyw:** Gwryw  
**Galwedigaeth:** gweinidog olaf y Crynwyr yng Ngogledd Cymru  
**Maes gweithgaredd:** Crefydd  
**Awdur:** Robert (Bob) Owen

Ganwyd yn 1681, yn fab, efallai, i Thomas Goodwin (gynt o Lanidloes), a oedd yn aelod gyda'r Crynwyr yn Dolobran, Sir Drefaldwyn. Ymaelododd John Goodwin, c. 1708, gyda'r Crynwyr yn Llangurig a daeth yn weithiwr egniol yn eu plith, a maes ei weinidogaeth yn ymestyn o Langurig hyd at odreon Aran Benllyn, Aran Fawddwy, a Chader Idris. Pan oedd tua'r canol oed ymwelai'n fynych â chanolfannau'r Cyfeillion yn eu cyfarfodydd blynyddol yng Nghymru a Lloegr. Ceir cyfeiriadau mynych ato yn nyddiadur [John Kelsall](#), a thelir teyrnged iddo gan Grynwyr yn Lloegr a Pennsylvania yn eu tystiolaethau. Canolfan ei weinidogaeth oedd ei dyddyn ef ei him, sef Esgair Goch, plwyf Trefeglwys, Sir Drefaldwyn. Yn 1710 ceisiodd ganiatâd i ymfudo i Pennsylvania, ond ni fynnai'r Cyfeillion iddo ymadael oddi wrthynt; wedi marw [Richard Davies](#), Cloddiau Cochion, edrychid arno fel blaenor yn llanw lle hwnnw a gwrthodwyd llythyr ymadawiad iddo. Y mae'n bosibl iddo symud tua diwedd ei oes i Sir Feirionnydd i areilïo ei braidd yn Llwyndu (Llwyngwriil) a Tyddynygarreg (ger Dolgellau) [gweler [Lewis Tyddyn-y-garreg](#)]. Pa fodd bynnag am hynny ceir hanes am ei fab a'i ferch-yng-nghyfraith, John a Mary Goodwin, yn bedyddio merch (Sarah) yn eglwys Dolgellau (14 Tachwedd 1766) fel Crynwyr. Claddwyd ef yng ngardd gladdu Llwyndu (Llwyngwriil), 12 Rhagfyr 1763.

### Awdur

Robert (Bob) Owen, (1885 - 1962)

### Ffynonellau

*Piety Promoted, in a Collection of Dying Sayings of the People called Quakers*, arg. 1789, iii, 185-7

cofrestr plwyf Dolgellau

cofysgrifau chwarter sesiwn sir Drefaldwyn

'Bishops' Visitation,' esgobaeth Bangor, 1749

*Y Dysgedydd*, 1883, 318-21

*Wales, a National Magazine for the English speaking parts of Wales*, 1895, 1896

### Dolenni Ychwanegol

Wikidata: [Q20733423](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.